



Sesida dals

8 d'avrigl 2025

Communitgà ils

10 d'avrigl 2025

Protocol nr.

228/2025

Incumbensa Bettinaglio

concernent contribuziuns da transformaziun per furniturs da prestaziuns en il
provediment da la sanadad dal Grischun

Resposta da la Regenza

Cun il conclus dals 21 da schaner 2025 (prot. nr. 39/2025) ha la Regenza incumben-
sà il Departament da giustia, segirezza e sanadad da reveder e d'actualisar il «Model
directiv concernent l'organisaziun dal provediment da la sanadad en il chantun Gri-
schun» dals 27 da november 2013. En il rom da questas lavurs duai vegnir mussà,
en tge direcziun ch'il provediment da la sanadad en il Grischun duai sa mover en
l'avegnir. En spezial duai il model directiv revedì servir sco basa per la planisaziun
dals ospitals 2026. Ultra da quai duai el sclerir eventualas adattaziuns legalas ne-
cessarias, sco per exempel la flexibilisaziun da la furma d'organisaziun dals furniturs
da prestaziuns, ubain ulteriurs models da finanziaziun.

Cun questa incumbensa è la Regenza suandada la pretensiun preschentada en nu-
merusas posiziuns en il rom da la consultaziun davart la revisiun parziala da la Le-
scha per promover la tgira da persunas malsaunas e l'assistenza da persunas attem-
padas e da persunas che basegnan tgira (Lescha per promover la tgira da persunas
malsaunas, LTM; DG 506.000) cun l'intent da stgaffir ina basa legala per garantir la
liquiditad dals ospitals grischuns subvenziunads dal maun public sco er en differents
votums en la sessiun d'october 2024 cun tractar l'incumbensa Beeli concernent la
surpigliada da la cuvrida finanziara insufficienta en il sector d'ospital ambulat.

Cun la refurma concernent la finanziaziun unitara (EFAS), acceptada a la votaziun
federala dal pievel dals 24 da november 2024, vegnan en l'avegnir tut las prestaziuns
da l'assicuranza obligatorica per la tgira da malsauns (AOMal) finanzadas da las as-
sicuranzas da malsauns e dals chantuns tenor la medema clav da repartiziun, inde-
pendentamain dal fatg, sch'ellas vegnan furnidas en moda ambulanta, staziunara u
en ina chasa da persunas attempadas e da tgira. Per il sector medicinal entra la

finanziaziun unitara en vigur il 1. da schaner 2028, per chasas da persunas attempadas e da tgira, per la Spitex e per tgirunzas e tgirunzs che lavuran independentamain il 1. da schaner 2032. Questa refurma pretenda ina midada cumplessiva da las regulaziuns da finanziaziun correspondentas en la Lescha per promover la tgira da persunas malsaunas cun ina preschentaziun generala correspondent a las consequenzas per ils furniturs da prestaziuns, per il chantun e per las vischnancas.

Tar il punct 1: En il rom da la revisiun dal model directiv concernent l'organisaziun dal provediment da la sanadad vegnan er analisads las structuras ed ils models da finanziaziun existents en il sector da sanadad dal chantun Grischun. La finamira è quella da valitar la situaziun da finanziaziun da las acturas e dals acturs relevants – dals ospitals sur las organisaziuns da Spitex, da las chasas da persunas attempadas e da tgira fin a las praticas cuminaivlas da medis da chasa. Il model directiv reveid duess esser avant maun fin mez da l'onn 2026.

Tar il punct 2: Il process legislativ che vegn pretendì per contribuziuns à fonds perdu per projects e per investiziuns en las organisaziuns da sanadad vegn examinà pli detagliadamain en il rom da la realisaziun da las mesiras che resultan dal model directiv. In eventual process legislativ en quest connex vegn raschunaivlamain cumenzà pir suenter.

Tar il punct 3: Per garantir a lunga vista ils meds finanzials necessaris per investiziuns en las organisaziuns da sanadad che sa refereschan a projects, vegn examinada – a chaschun da la revisiun dal model directiv – er la pussaivladad d'ina soluziun da finanziaziun persistente che tegna quint tant da las transfurmaziuns infrastrukturalas sco er da las transfurmaziuns structuralas.

Sa basond sin questas explicaziuns propona la Regenza al Cussegl grond d'acceptar l'incumbensa qua avant maun.



En num da la Regenza

Il president:

Marcus Caduff

Il chancelier:

Daniel Spadin